

**Тропари и кондаки
Пасхи,
двѣнадцатых
и великих
праздников**

СВЕТЛОЕ ХРИСТОВО ВОСКРЕСЕНИЕ. ПАСХА

Тропарь (глас 5)

Христос воскресе из мертвых, смертию
смерть поправ, и сущим во гробех живот
даровав.

Кондак (глас 8)

Аще и во гроб снизшел еси, Безсмертне,/ но
адову разрушил еси силу,/ и воскресл еси, яко
Победитель, Христе Боже,/ женам
мироносицам вещавый: радуйтесь,/ и Твоим
Апостолом мир даруяй, // падшим подаяй
воскресение.

Двунадесятые праздники

Рождество Пресвятой Богородицы

(8 сентября/ 21 сентября)

Тропарь (глас 4)

Рождество Твое, Богородице Дево,/ радость
возвести всей вселенней:/ из Тебе бо возсия
Солнце Правды, Христос Бог наш,/ и, разрушив
клятву, даде благословение,// и, упразднив
смерть, дарова нам живот вечный.

Кондак (глас 4)

Иоаким и Анна поношения безчадства/ и
Адам и Ева от тли смертныя свободистася,
Пречистая,/ во святем рождестве Твоем./ То
празднуют и людие Твои,/ вины прегрешений
избавльшеся,/ внегда звати Ти:// неплоды
раждает Богородицу и Питательницу Жизни
нашея.

Воздвижение Честно́го и Животворящего Креста Господня

(14 сентября/ 27 сентября)

Тропарь (глас 1)

Спаси, Господи, люди Твоя/ и благослови
достояние Твое,/ победы православным
христианам/ на сопротивныя даруя/ и Твое
сохраняя// Крестом Твоим жительство.

Кондак (глас 4)

Вознесыйся на Крест волею,/
тезоименитому Твоему новому жительству/
щедроты Твоя даруй, Христе Боже,/ возвесели
нас силою Твоею,/ победы дая нам на
супостаты,/ пособие имущим Твое оружие
мира,// непобедимую победу.

Введение во храм Пресвятой Богородицы

(21 ноября/ 4 декабря)

Тропарь (глас 4)

Днесь благоволения Божия предображение/
и человеков спасения проповедание/ в храме
Божии ясно Дева является/ и Христа всем
предвозвещает./ Той и мы велегласно
возопиим:// радуйся, смотрения Зиждителява
исполнение.

Кондак (глас 4)

Пречистый храм Спасов,/ многоценный
чертог и Дева,/ священное сокровище славы
Божия,/ днесь вводится в дом Господень,
благодать совводящи,/ Яже в Дусе
Божественном,/ Юже воспевают Ангели
Божии:// Сия есть селение Небесное.

Рождество Христово

(25 декабря/ 7 января)

Тропарь (глас 4)

Рождество Твое, Христе Боже наш, / возсия
мирови свет разума: / в нем бо звездам
служащи, / звездою учахуся, / Тебе кланятися,
Солнцу правды, / и Тебе ведети с высоты
Востока: // Господи, слава Тебе.

Кондак (глас 3:

Дева днесь Пресущественнаго раждает, / и
земля вертеп Неприступному приносит: / ангели
с пастырьми славословят, / волсви же со
звездою путешествуют: // нас бо ради родися
Отроча младо, Превечный Бог.

Богоявление. Крещение Господне

(6 января/ 19 января)

Тропарь (глас 1)

Во Иордане крещающуся Тебе, Господи,/ троическое явися поклонение,/ Родителей бо глас свидетельствоваше Тебе,/ возлюбленного Тя Сына именуя,/ и Дух в виде голубине,/ извествоваше словесе утверждение./ Явлейся Христе Боже, // и мир просвещей, слава Тебе.

Кондак (глас 4)

Явился еси днесь вселенней,/ и свет Твой, Господи, знаменася на нас,/ в разуме поющих Тя:/ пришел еси, и явился еси, — // свет неприступный.

Сретение Господне

(2 февраля/ 15 февраля)

Тропарь (глас 1)

Радуйся, Благодатная Богородице Дево,/ из Тебе бо возсия Солнце правды, Христос Бог наш,/ просвещающий суция во тьме./ Веселися и ты, старче праведный,/ приемый во объятия Свободителя душ наших,// дарующаго нам воскресение.

Кондак (глас 1)

Утробу Девичу освятивый рождеством Твоим,/ и руце Симеоне благословивый,/ якоже подобаше, предварив,/ и ныне спасл еси нас Христе Боже,/ но умири во бранех жительство,/ и укрепи люди, их же возлюбил еси, едине Человеколюбче.

Благовещение Пресвятой Богородицы

(25 марта/ 7 апреля)

Тропарь (глас 4)

Днесь спасения нашего главизна/ и еже от
века таинства явление:/ Сын Божий Сын Девы
бывает,/ и Гавриил благодать благовествует./
Темже и мы с ним Богородице возопиим:/
радуйся, Благодатная,// Господь с Тобою.

Кондак (глас 8)

Взбранной Воеводе победительная,/ яко
избавльшеся от злых,/ благодарственная
восписуем Ти, раби Твои, Богородице,/ но, яко
имущая державу непобедимую,/ от всяких нас
бед свободи, да зовем Ти:// радуйся, Невесто
Неневестная.

Вход Господень в Иерусалим

(воскресенье перед Пасхой)

Тропарь (глас 1)

Общее воскресение/ прежде Твоя страсти
уверяя/ из мертвых воздвигл еси Лазаря,
Христе Боже./ Темже и мы, яко отроцы победы
знамения носяще,/ Тебе Победителю смерти
вопием:/ осанна в вышних, // благословен
Грядый во имя Господне.

Другой Тропарь (глас 4)

Спогребшеся Тебе крещением, Христе Боже
наш,/ безсмертныя жизни сподобихомся
воскресением Твоим,/ и воспевающе зовем:/
осанна в вышних, // благословен Грядый во Имя
Господне.

Кондак (глас 6)

На престоле на небеси,/ на жребяти на
земли носимый, Христе Боже,/ Ангелов
хваление и детей воспевание приял еси
зовущих Ти:// благословен еси, грядый Адама
воззвати.

Вознесение Господне

(40-й день по Пасхе, четверг)

Тропарь (глас 4)

Вознеслся еси во славе, Христе Боже наш,/
радость сотворивый учеником, / обетованием
Святаго Духа, / извещенным им бывшим
благословением, // яко Ты еси Сын Божий,
Избавитель мира.

Кондак (глас 6)

Еже о нас исполнив смотрение, / и яже на
земли соединив Небесным, / вознеслся еси во
славе, Христе Боже наш, / никакоже отлучаяся, /
но пребывая неотступный, / и вопия любящим
Тя: // Аз есмь с вами, и никтоже на вы.

День Святой Троицы. Пятидесятница

(50-й день после Пасхи)

Тропарь (глас 8)

Благословен еси, Христе Боже наш, / Иже премудры ловцы явлей, / низпослав им Духа Святаго, / и теми уловлей вселенную, //
Человеколюбче, слава Тебе.

Кондак (глас 8)

Егда снизшед языки слия, / разделяше языки Вышний, / егда же огненные языки раздаяше, / в соединение вся призва; // и согласно славим Всесвятаго Духа.

Преображение Господне

(6 августа / 19 августа)

Тропарь (глас 7)

Преобразился еси на горе, Христе Боже,/
показавый учеником Твоим славу Твою,/
якоже
можаху,/
да возсияет и нам, грешным,/
Свет
Твой присносущный/
молитвами Богородицы, //
Светодавче, слава Тебе.

Кондак (глас 7)

На горе преобразился еси,/
и якоже
вмещаху ученицы Твои,/
славу Твою, Христе
Боже, видеша,/
да егда Тя узрят распинаема,/
страдание убо уразумеют вольное,/
мирови же
проповедят, //
яко Ты еси воистинну Отчее
сияние.

Успение Пресвятой Богородицы

(15 августа / 28 августа)

Тропарь (глас 1)

В рождестве девство сохранила еси,/ во
успении мира не оставила еси, Богородице,/ /
преставилася еси к животу, Мати сущи
Живота,/ / и молитвами Твоими избавляеши от
смерти души наша.

Кондак (глас 2)

В молитвах неусыпающую Богородицу,/ и в
предстательствах непреложное упование,/ / гроб
и умерщвление не удержаста:/ / якоже бо
Живота Матерь,/ / к животу престави,/ / во утробу
Вселивыйся приснодевственную.

Великие праздники

Покров Богородицы

(1 октября/ 14 октября)

Тропарь (глас 4)

Днесь, благовернии людие, светло
празднуем,/ осеняеми Твоим, Богомати,
пришествием,/ и к Твоему взирающе
пречистому образу, умильно глаголем:/ покрый
нас честным Твоим Покровом/ и избави нас от
всякаго зла,/ молящи Сына Твоего, Христа Бога
нашего, // спасти души наша.

Кондак (глас 3)

Дева днесь предстоит в церкви/ и с лики
святых невидимо за ны молится Богу,/ Ангели
со архиереи покланяются,/ апостоли же со
пророки ликовствуют:// нас бо ради молит
Богородица Превечнаго Бога.

Обрѣзание Господне

(1 января/ 14 января)

Тропарь (глас 1)

На Престоле огнезрачном/ в Вышних седяй
со Отцем Безначальным и Божественным
Твоим Духом,/ благоволил еси родитися на
земли/ от Отроковицы Неискусомужная, Твоя
Матере, Иисусе,/ сего ради и обрезан был еси,
яко Человек осмодневный./ Слава всеблагому
Твоему совету,/ слава смотрению Твоему, //
слава снизхождению Твоему, Едине
Человеколюбче.

Кондак (глас 3)

Всех Господь обрезание терпит/ и
человеческая прегрешения, яко Благ, обрезае,/
дает спасение днесь миру./ Радуется же в
Вышних и Создателев иерарх, // и светоносный,
Божественный таинник Христов Василий.

Рождество Иоанна Предтечи

(24 июня/ 7 июля)

Тропарь (глас 4)

Пророче и Предтече пришествия Христова,/
достойно восхвалити тя недоумеем мы,
любовию чтущии тя:/ неплодство бо рождшия и
отчее безгласие разрешися/ славным и
честным твоим рождеством, // и воплощение
Сына Божия миру проповедуется.

Кондак (глас 3)

Прежде неплоды днесь Христова Предтечу
раждает, / и той есть исполнение всякаго
пророчества:/ Егоже бо пророцы
проповедаша, / на Сего во Иордане руку
положив, // явися Божия Слова пророк,
проповедник, вкупе и Предтеча.

Святых апостолов Петра и Павла

(29 июня/ 12 июля)

Тропарь (глас 4)

Апостолов первопрестольницы/ и
вселенная учителяе,/ Владыку всех молите,/
мир вселенней даровати// и душам нашим
велию милость.

Кондак (глас 2)

Твердые и боговещанная проповедатели,/
верх апостолов Твоих, Господи,/ приял еси в
наслаждение благих Твоих и покой:/ болезни
бо оных и смерть приял еси паче всякаго
всеплодия,// Едине сведый сердечная.

Усекновение главы Иоанна Предтечи

(29 августа/ 11 сентября)

Тропарь (глас 2)

Память праведнаго с похвалами,/ тебе же
довлеет свидетельство Господне, Предтече:/
показал бо ся еси воистинну и пророков
честнейший,/ яко и в струях крестити
сподобился еси Проповеданнаго./ Темже за
истину пострадав, радуяся,/ благовестил еси и
сущим во аде Бога, явльшагося плотию,/
вземлющаго грех мира// и подающаго нам
велию милость.

Кондак (глас 5)

Предтечево славное усекновение/
смотрение бысть некое Божественное,/ да и
сущим во аде Спасово проповестъ пришествие./
Да рыдает убо Иродия,/ беззаконное убийство
испросивши:/ не закон бо Божий, ни живой век
возлюби,// но притворный, привременный.